

## Jahresbericht Präsidium amathea.ch 2024/25

Nutze alles an Begabung, was du hast. Es wäre still in den Wäldern, würden nur die Vögel singen, die es am besten können.

Zen-Weisheit

Es git doch nüt schöner, aus wenn e Gruppe vo Lüt zäme isch, mit au ihrne Begabige, u daderdür es Gsamtpjekt entsteit.

Zumene Ganze wird's nume, wenn aui am glische Strick zieh, sech gägesitig understütze u o Freiruum lö, d Begabige izsetze. So steckt am Schluss näbe Arbeit o viu Härzbluet drin! Das funktioniert im Alltag eso u natürlech o im Theaterbereich.

I gloube, dass äbe die Lideschaft cha häufe, Sache z erreiche, wo me vorhär vilech no kes Talänt in sich entdeckt het.

Genau das gseh i immer wieder, wenn i bi öich darf cho Produktione gniesse! Egal weles Alter, weles Ussehe, weli Härkunft, weli Talänt! Fröid, Begeischerig u z Gmeinsame si z Erfougsrezäpt!

E chline Überblick zum vergangene Verbandsjahr:

Z Burgdorf hei mir a üsere HV e spannende Iblick iz Casino übercho u si o no magisch verblüfft worde. Z feine Buffet het dä Alass abgründet u dr eint oder di anderi si no lenger blibe höckle.

Ja u mit grosse Schritte isch di verschobni JV vom ZSV in Meiringe necher grückt. Dank Unterstützig vo Lüt usem Verband hei mir`s gschafft, aues zum richtige Zitpunkt parat z ha. U o we mir üs am Sunti Abe, sogar mit einige Blessure, müed ufe Heiwäg gmacht hei, het sech es zfidnigs Gfühel i üs breit gmacht.

U scho isch e haubi Wuche speter Meiringe ume üses «Dehei» gsi. Es paari vo üs hei grad düregmacht u si z Meiringe blibe, für de am Volkstheaterfestival z häufe oder derbi z si! Wie geng isch`s es Erläbnis gsi, mit so viune Theaterlüt dörfe Zyt z verbringe.

Üse Mitglialeralass ufem Bremgartefriedhof isch uf grosses Interässe gtosse u d Therese u dr Chlöisu hei üs mit witzige u erstunleche Details über einzeln Verstorbeni unterhaute, umrahmt mit passendem Gsang! Schön isch es gsi, merci!

Im Witerbiudigsbereich si total 29 Kurse abotte worde, 13 hei chönne düregführt wärde u 16 hei leider müesse abseit wärde. Im amathea Gebiet hei vo de 5 Kürs 2 chönne stattfinde.

Auso lueget z nöie Kursprogramm a u entdeckt vilech ame Kurs ganz nöii Talänt i öich.

Sitzige u Klousure het`s im ZSV sehr vili Gä, um einigi grossi Theme z bespräche. O im amathea Vorstand si mir dranne gsi. Under anderem hei mir d Statute überarbeitet. Danke möchte i a dere Steu au mine Vorstandskolleginne u -kollege für öii grossi Arbeit u öii Talänt. I cha immer wieder lere vo öich!

Es grosses Merci o a öich Mitglieder für öies Vertraue i üs u üse Verband u dass dir öich mit au öine Talänt immer wieder für e Kulturbereich isetzt!  
I ha viu tolli Theater dörfe gniesse u sogar e 100 Jahr Fiir in Raron. Härzlechi Gratulation!  
Das isch ir hütige schnäuläbige Zit ke Sälbstverständlechkeit!

Leider isch das Vereinsjahr o überschattet worde.  
Es paar Härzbluet-Theatermönsche hei d Ärd Bühni müesse verla! Zwe dervo, wo üs im ZSV jahrelang unterstützt hei.  
Liebe Zälli u liebe Hannes, mir chöis immer no nid gloube u es fähle üs d Wort! Mir vermisse öich u erinnere üs i viune Situatione a öich, öii Tatchraft, Begeischerig u öii Talänt! Merci viu Mau für aues wo dir üs gä heit!

Es isch mir ume einisch meh bewusst worde, wir schnäu dr Vorhang cha zue ga. Drum:

Gniesse mir di viele zouberhafte Momänte, wo üs üses wunderbare Hobby git! D  
Erinnerige a au di schöne Stunde cha üs niemer nä!

Häbet Sorg zuenech u zunenand!

Im Mai 2025

Härzlech

Pia Abplanalp  
Präsidentin amathea.ch

